

Sostenemi ta continua cu campaña "Tuma Accion" Aña pasa a compila 184 caso di abuso y maltrato contra menor na Sostenemi



ORANJESTAD - Sostenemi ta continua cu nan campaña di concientisacion titula "TUMA ACCION". Director di Sostenemi, Sra. Lenny Geervliet a trece dilanti cu Sostenemi ta e centro pa conseho y coördinacion den caso di abuso

y maltrato contra menor. Sra. Geervliet a enfatisa cu Sostenemi tin e tarea pa registra e casonan di abuso, maltrato y negligencia cu ta sosodiendo na Aruba. Sostenemi no ta duna therapia. E personanan cu

ta yama Sostenemi por spera conseho y guia den sentido con y unda un ciudadano por bai cu preocupacion pa cu un mucha cu ta den dificultad. Sostenemi ta coordina e caso y ta duna informacion unda e mucha lo por ricibi ayudo mas liher cu ta posibel, esaki segun cada caso.

E preocupacion cu ta reina segun yamadanan cu Sostenemi ta ricibi durante e ultimo luna ta di e mayornan cu ta bai wak Carnaval cu baby chiquito y tambe esnan cu ta hiba mucha na fiestanan publico y happy hours. Sostenemi a trece dilanti cu ta importante pa mayornan plania bon si nan kier sali y percura pa nan yiu tin un bon caminda cu nan por drumi nan oranan necesario y cu nan por keda cu un persona responsabel. E registracion di Bureau

Sostenemi ta hopi importante segun Director Geervliet, ya cu ta di e forma aki so nan por haya un bista real ariba e magnitud y seriedad di e problema di maltrato, negligencia y abuso aki na Aruba. Basa ariba e datonan cu Sostenemi tin prepara lo por forma un base pa un maneho pa futuro. Asina aki lo por haña un bista ki sorto di instancianan di "opvang" pa e hubentud lo mester crea pa evita problemanan den futuro.

Liliana Frederica, trahador social na Bureau Sostenemi tambe a trece dilanti e cifranan cu a keda registra aña pasa te cu awor. Aña pasa a compila 184 caso na Sostenemi, di cual esun cu a sobresali mas tabata e abuso fisico cu un total di 44 caso. Tin diferente grado di abuso cu a tuma lugar pero ta importante pa sa cu abuso fisico ta keda hunga un rol hopi grandi y ta un di e maltratonan cu ta sosode mas cu e muchanan. Tambe a raporta casonan di muchana cu no ta bai scol. Esaki a resulta un cantidad basta halto di 37 caso. Pa un of otro motibo e mayor of esun responsabel no ta manda e menor scol. Esaki tambe ta un forma di abuso di mucha ya cu e tin derecho ariba su educacion y abo como mayor responsabel mester percura pa esaki tuma lugar. Tin excepcion pa motibonan valido cu un persona lo por tin pa no manda su yiu scol, di otro manera ta wordo verwacht pa e mucha bai scol tur dia.

E negligencia fisico tambe a keda registra basta halto segun Sostenemi. Negligencia fisico ta nifica cu e mucha no ta ricibi un bon nutricion of un bon higiene tur dia. Tabata tin 36 caso di esakinan. Tambe a registra casonan di violencia domestico. Sostenemi a ripara cu mas y mas mucha ta presencia violencia domestico y esaki ta causa trauma den e muchanan.

E ta causa cu nan no por funciona normal mas na scol. Nan tin miedo y no tin un sentimiento di seguridad mas na cas. Sostenemi ta registra e casonan aki ya cu den fuuturo e muchanan aki lo tin mester di



ayudo. Un total di 15 caso den e categoria aki a keda registra. Sostenemi tambe a registra casonan di comportacion di muchanan cu ta trese abuso fisico. Esta cu e mucha su comportacion ta pone e mayor rabia asina hopi cu e no sa con pa anda cu esaki. Na rais di esaki ta bin tambe abuso di e menor. Di esaki tambe a registra 37 caso.

E severidad di e casonan ta varia segun Sostenemi, pero ta bon pa registra esakinan ya cu a base di e cifranan aki lo por wak mas y mas kiko tin mester. Por ehempel na e scolnan a ripara cu tin hopi necesidad pa e maestronan y e mayornan ricibi mas ayudo di afo pa por anda cu e problemanan aki. Liliana Frederica ta bisa cu awendia no ta solamente na cas pero tambe scol ta forma un gran parti di e formacion di e mucha y tambe un gran parti di su network.

Sostenemi a gradici tur e scolnan cu a coopera asina bon cu nan na aña 2006. Nan a pone nan confianza den Sostenemi, cual nan ta hopi contento cu ne y cu e campaña aki kier concientisa publico cu abo tambe tin un responsabilidad ora cu ta trata di muchanan ey fo. No ta solamente si e ta bo famia of bo yiu., Cosnan cu bo ta wak rond di bo, abo tambe por hasi algo pa evita cu e mucha su calidad di bida ta bai mas atras.

Si bo ta wak algo pasa tuma responsabilidad, yama Sostenemi y bo lo ricibi un conseho. Si e no ta na bo persona pa hasi algo e ora Sostenemi lo pone e caso den man di e instancia concerni. Sostenemi ta enfatisa: TUMA ACCION pa proteccion.